



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

*Komunikadu Imprensa  
Tribunál Distritál Dili  
10 Fevereiru 2015*

## **JSMP kontinua fasilita treinamentu ba lideransa komunitáriu iha Suku Rasa Distritu Lautem**

Iha 05 Fevereiru 2015, Judicial System Monitoring Programme (JSMP) hala'o treinamentu kona-ba "lala'ok justisa formal" ba iha Suku Rasa, Distritu Lautem.

Partisipantes ba treinamentu ne'e hamutuk ema nain 31 ne'ebé kompostu hosi feto 20 no mane 11. Partisipante sira ne'e mai hosi estrutura Suku Rasa inklui xefe suco, xefe aldeia, lia nain feto no joven sira.

Materia ba treinamentu ne'e kobre asuntu sira kona-ba kna'ar juis, prokurador, advogado privadu no defensor públiku. Aleinde ne'e esplika mós kona-ba kna'ar polísia no kazu krime sira, inklui oinsa comunidade sira hahu prosesa kazu krime tuir sistema justisa formal.

"Treinamentu ba lideransa comunidade sira nu'udar komitmentu ida hosi JSMP hodi kontinua hakbesik ita nia sistema justisa formal ba comunidade sira liuhosi lideransa komunitáriu sira tanba sira mak autór xavi no besik liu ba iha comunidade," dehan diretór Ezekutivu JSMP, Luis de Oliveira Sampaio.

Entretantu Xefi Suku Rasa, Sr. Joaquim Lopes iha nia abertura hato'o nia agradesimentu ba JSMP tanba bele hili sira nia suku hodi fahe informasaun importante kona-ba lalaok justisa formal.

Xefe suku subliña katak programa ne'e bele ajuda sira ne'ebé hela dok husi área justisa atu iha koñesimentu ba sistema justisa formal tanba treinamentu ne'e nu'udar oportunidade primeira-ves ba suku ne'e hetan programa treinamentu kona-ba lala'ok justisa formal.

Durante prosesu treinamentu partisipantes sira hatudu antusiasmu no hatudu sira nia interese atu hatene klea'n informasaun ne'ebé treinador sira fo, liu-liu kona-ba kazu sira ne'ebé akontese iha sira nia suku hanesan relasiona ho kazu krime violénsia doméstika, violénsia seksual no krime sira seluk ne'ebé baibain akontese iha sira leet.

Partisipantes balun kestiona kona-ba natureza gravidade hosi krime violénsia doméstika. Tanba tuir sira krime violénsia doméstika hanesan krime públiku maibé tanba-sa hetan pena/sentensa ne'ebé kmaan.

Ba kestaun ne'e, JSMP tenta atu lori sira ba kumpriende provizaun artigu 66 Kódigu Penal kona-ba pena prizaun nia durasaun. Iha alinea 1 artigu ne'e dehan katak pena prizaun tenke dura pelu menus loron 30 no la bele liu tinan 25. Maske nune'e, prácticamente juis sira iha opsaun atu eskolla opsaun kona-ba pena ne'ebé tribunál atu atribui ba kazu sira tuir ida-idak nia gravidade. Mesmu nue'e, tribunál tenke asegura katak kualker pena ne'ebé tribunál hili tenke iha nia kbi'it atu halo arguidu sira sente tauk hodi komete krime hanesan iha futuru.

JSMP esplika no konkorda katak violénsia doméstika tenke hetan sentensa ne'ebé todan atu preve krime akontese barak liu iha futuru.

Atividade treinamentu ne'e, realiza tanba hetan suporta husi *Finlandia*.

Atu hetan informasaun kompleitu bele kontaktu ba:

Luis de Oliveira Sampaio  
Diretór Eksekutif JSMP  
Alamat e-mail: [luis@jsmp.minihub.org](mailto:luis@jsmp.minihub.org)  
[info@jsmp.minihub.org](mailto:info@jsmp.minihub.org)  
Telefone:3323883 | 77295795